

Pedru kute memã pi'ôk kumrêx no'ôk ne ja.

Jejukôt ba djwýnhbê Pedru ne mebê idjaer kute amim Jeju marjamã pi'ôk no'ôk ne. Ar ja ne ar apýnh pykakôt ajmã nhym me Jejukôt aro ajkê ne. Nhym kam Pedru kute aro týx ne o kînhmã arkum pi'ôk no'ôk ne. Ne arkum,

—Mrâmri ne gwaj pykajabê babari Jejukôt batokry. Te batokry gwaj Jeju'ã bangrà týx. Arým gwaj bakutêp gwaj bakînh djã dji. Gwaj Jeju'ã amijakren kudjwa te batokryn tu amikajmâtã Jeju kamnhîx ne bakînh. Nãm ã Pedru arkum ane.

1 ¹Ibê Pedru. Jeju Kritu ne ijano ba memã 'ã idjujarênh ar iba. Ba ne ba pi'ôk no'ôkkam ar amã ikabên jarê. Amrêbê gar apýnh me ò pykakôt aben bê abingrànha nhym me kute ar ajo me bajtemo baja ba ar amã ikabên. Pykabê Pôtukam, Garaxakam Kapadôkam, Adjijkam, Bixinijkam, ar aben bê abingrànha, ba ar amã ikabên jarê.

²Metîndjwýnh, me Babãm djwýnh arým amijo ar apytã. Amrêbê: mýjja kunî kator kêtri amijo ar apytã. Kute prîne amikukãm mýjja kunî markam amijo ar apytã. Karô ne ar ajo mexo ba gar arým kôt amextiren ajmã akute kêt ne ar aba. Ne kam katât Jeju Kritu kabên man kôt ar amijo aba. Amrêbê: ne me bakukãmãre mry kamrôo me kaprêk nhym Metîndjwýnh arým me axwe maro aknon mekam ngryk kêt ne. Jakamdjwý arým Kritu pîte'ykam ty nhym kamrô prôt. Kam ne Metîndjwýnh arým ar ajaxwe maro aknon ar akam ngryk kêt.

Gê tu kum ar akapri:kumrêx^a gar adjumar mexo amũ amikamên arým adjumar mexkumrêx ne.

Mýj ne me kute amiwýr kamnhîxmã?

Rô 8.29; Ep 1.4; A Xim 1.9; Ped k 2.9

³Ba Metîndjwýnhmã mextire jarê. Metîndjwýnh ne ra:xkumrêx. Kubê Bênjadjwýr djwýnhbê Jeju Kritu Bãm. Ta ne ukapri raxi. Ukapri raxkôt ne arým gwaj bamã amak bô. Ga, me nã kurũm apôxkam me umar djã nyja pumũ. Metîndjwýnhdjwý ne gwaj bajamak bô gwaj arým badjumar djã nyn kam bamã katât amijo baba prã:m ne bamã Metîndjwýnh kî:nhkumrêx. Jeju Kritu tyk ne

^a1.2 Djãm ar ga ne gar adjukapri nhym pãnh arým kum ar akapri Kati. Ta ne tu kum ar akaprikumrêx.

akubyn tĩnkam ne arỳm gwaj bamã bajamak bô gwaj arỳm badjumar djà ny. Kute gwaj bamã bajamak bônkhkam gwaj tu 'ỳr babôxmã kamnhĩxkumrêx. Dja gwaj 'ỳr bôx ne kôt ar baba rã'ã: rã'ã ne. ⁴Nhym kam arỳm gwaj bamã mỳjja mexti:re ngã, gwaj bamã mỳjja kume:x ngã. Djãm mỳjja rerekmã? Kati. Djãm punumã? Kati. Mỳjja mex rã'ã: rã'ã ne. Kàjkwa djwỳnhkam ne arỳm ar amã kudji.

⁵Itỳxo Metĩndjwỳnh kute mã amim ar apytàr mex ne ar ajo ba. Gar tu amim markumrêx nhym kute mã 'itỳxo ar apytàr mex ne ar ajo ba. Dja mã amim ar ajo ba: nhym me kute aminhinomã amimēnh djà nhô akati arỳm bôx. Bôx nhym arỳm prĩne amimex kôt ar ajo mexkumrêx.

⁶Jakam godja gar apỳnh mỳjjakam akapri jabej. Me kum ar akurê nàr akanê nàr anhôbikwa'ô abê tyk nàr mỳjja 'ôdjwỳkam akapri jabej. On dja akapri kêt ne. Dja te akaprin akĩnti:re. Mỳkam? Bir, dja gar Metĩndjwỳnhkôt amexi:rekumrêx. Ja ne gar amiwỳr kam ama. Kam ne gar akĩnti:re. Akapri japôkmã akĩnti:re.

⁷Ga, kên karỳrkam punu kunĩ kator kadjy me kute kuwykam adjwỳrja pumũ. Nhym kam arỳm mexkumrêx. Ar gadjwỳ dja me kum ar akurê nàr akanê nàr anhôbikwa'ô abê tyk nàr mỳjja 'ôdjwỳkam akapri jabej. Kam dja gar amim Metĩndjwỳnh man amim maro amũ amikamēn arỳm mar rax ne. Aje Metĩndjwỳnh mar raxkam akĩnhkumrêx. Kam akĩnho kên karỳrkam me kĩnhja jakrenh me:x ne. Kên karỳr dja on akuno. Nhym be, ar ga dja gar tu amim Jeju Kritu mar raxkumrêx nhym akubyn bôx ne apumũn ar ajã amim, —Be, inhô me wã mex djô'a ne me mã imex jarēn irax jarē ba kam arỳm ikĩnhkumrêx, ane. Dja ã ar amex djô'a ane.

⁸Ar ga ne gar omũnh kêt. Te aje omũnh kêt ne amã abê:kumrêx. Te jakam aje omũnh kêt ne aje tu amim markumrêxkam arỳm akĩ:nhkumrêx ne te: aje akĩnh'ã memã amijarēnh mex prãmje. ⁹Metĩndjwỳnh kute ar apytarmã gar tu amim Kritu markumrêx nhym arỳm ar apytã gar kam arỳm akĩ:nhkumrêx.

¹⁰Djãm amrêbê: ne Metĩndjwỳnh kukwakam kabēn jarēnh djwỳnh kute gwaj bapytàr mar? Mỳjjao Metĩndjwỳnh kute gwaj bapytarmã djãm me kute mar? Kati. Nãm me memã kum,

—Metĩndjwỳnh ta dja ĩ tu kum me kaprikumrêx, anhỹro ba. Jabit ne me arē. Ne kam te: kute amikukãm gwaj bapytàr mar mex prãmje. Nãm me te: kute marmã prĩne pi'ôkkôt abenã Metĩndjwỳnh kabēn jarēn abenmã kum,

¹¹—Je tô, mỳj xēja ne Metĩndjwỳnh ta tu mekam ukaprikumrêx? Mỳj dja me utàr on? Nhỹnh amex jakam dja ã meo ane? Nãm me ã amim ane. Nhym Kritu Karô me kadjwỳnhbê amijo kajkep ne memã Kritu'ã ajarē. Nãm memã kum,

—Dja tokryn kam ĩ arỳm raxkumrêx. Nãm ã Karô memã ane nhym me te: kute amikukãm gwaj bapytàr mar mex prãmje. Mỳjjao kute gwaj bapytàr ja te kute mar mex prãmje.

¹²Nhym kam Metĩndjwỳnh arỳm memã kum,

—Djãm me ajã ne ba ikabēn ja jarē ga me te: aje mar mexmã? Kati. Tũ:mrãm me akamingrãnyre'a ne ba ikabēn jarē, ane. Metĩndjwỳnh memã ane nhym kam 'ătũmkam ujarēnh djwỳnh ar arỳm kàj bê ar amã Kritu'ã ujarēnh ny jarē.

Kute kâjkwa kurûm memã Metîndjwýnh Karõ janorkõt me ar amã arê gar gajbit arým ama. Kadjy mrãnh djwýnhdjwý te kute mar prãmje gar gajbit arým ama.

Me mexti:ren axwe kêt ne ar ba'ã kute memã karõ.

Ep 4.1; Kor 1.10; Tex k 2.10; Xit 2.14

¹³Ar aje markam dja gar ano tÿx ne ajamak mex ne ajaxwe kêt kadjy amijãno djan mrãmri akính djâkam amakkumrêx. Kwãrik wãnh kam amak katêri 'ã adjukanga kêt. Dja Jeju Kritu bôx ne arým memã amijo amirît ne arým ar amã akính djâ nhõrkumrêx. ¹⁴Ga, me prîre kute nã kabên mar ne kôt kute amijo baja pumû. Ar gadjwý dja gar Metîndjwýnh kabên man kôt ar amijo aba. Amrêbê ne gar ajamakkre kêt ne amã mÿjja punu kînh. Kwãrik wãnh akubyn amã kînh kêt. ¹⁵Metîndjwýnh ne mexti:ren axwe kêtumrêx. Ar ga dja gar Metîndjwýnhkôt amextiren ajaxwe kêt ne ar aba. Amrãnh kunîkôt ajmã akute kêt ne ar aba. Metîndjwýnh ta ne amiwÿr ar ajuw ne ar ajo ba. ¹⁶Amrêbê: ne me bakukãmãremã kum,

“Ba ne ba imexti:ren ijaxwe kêtumrêx ne ar iba.

Dja gar ikudjwa amextiren ajaxwe kêt ne ar aba.”

Nãm ã me bakukãmãremã ane nhym me arým 'ã pi'òk no'òk. Kam dja gar amexti:ren ajaxwe kêt ne ar aba.

¹⁷Kâjkwakam me Babãm djwýnhmã ne gar amijo a'uw. Ta ne kute me kunî axwe markam kute memã axwe pãnh jarênh. Me kute axwekôt amijo badjari 'ãnh dja memã pãnh jarênh tẽ. Dja katàt me kunîmã pãnh jarê. Ar gadjwý kute ar amã ajaxwe pãnh jarênh karõ amijãno djan ar aba. Ga, me me bajtem nhõ pykakam ar bakam amijãno ãm ne katàt kute amijo baja pumû. Ar gadjwý pykakam ar abari amã Metîndjwýnh pyman amijãno dja. Ajaxwe kêt kadjy amijãno djan katàt ar amijo aba.

¹⁸Amrêbê ne gar te ajaxwe kêt mã ar akukãmãkjê kukràdjã kôt amijo aba kajgo:n ajaxwe rã'ã. Nhym kam Kritu arým ar ajaxweo pãnh nhym kam Metîndjwýnh arým tu ar amã axwe kêt jarê gar kum ajaxwe kêt. Djãm kryt jakao nàr kên karÿro ne ar ajaxweo pãnh? Kati.

¹⁹Metîndjwýnh ne kum kra kî:nh. Nãm te kum kînh ne arým pykamã ano nhym arým amikamrôo ar ajaxweo pãnh. Ga, me bakukãmãre kute mryki'átomti par ne kute Metîndjwýnhmã bôrja pumû. Mry punu kêt ne prîne kã mex ne me kupa. Kritudjwý ajmã kute kêt ne axwe kêtumrêx ne arým ar ajaxweo pãnh. Pîte'ykam ne kamrô prôt ne arým tyn kam arým o ar ajaxweo pãnh. Kam dja gar amijãno djan katàt ar amijo aba.

²⁰Mrãmri ne Metîndjwýnh amim Kritu'ã karõkumrêx. Amim tyk'ã karõkumrêx. Pykamẽ kâjkwamẽ mÿjja kunî kêttri ne amim 'ã karõkumrêx. Ne kam 'átumkam arým ar akadji Krituo amirît ne. Mÿjja kunî kute aminhinomã amimênh djâ nhõ akati jakam arým o amirît ne. ²¹Nãm ar akadji o amirît gar aje kôt tu amim Metîndjwýnh markumrêx. Nãm o amirît nhym ty nhym akubyn o tîn ne amiraxo o rax nhym arým ra:x ne uma:kumrêx. Mÿj

kadjy? Bir, gar aje tu amim Metĩndjwýnh markumrêx ne aje amiwýr kôt atĩn kamnhĩxmã. Ja kadjy ne akubyn Krituo tĩn nhym arým ra:xkumrêx.

²²Jakam ne gar arým kabẽn katàt man kôt ar amijo aban arým ajmã akute kêt ne ar aban arým mrãmri amã me abê katàtkumrêx. Jeju kukwakam me bakamyja amã me abê katàtkumrêx. Kam, dja gar ã anen amim ajaxwe'õ'ã karõ kêtikumrêx ne arým ar amã aben jabê:.

²³Ga, te bàygogo 'y mex ne punu prãmja pumũ. Nhym me bàygogo 'y mex kre nhym arým ingrõtja pumũ. Ar gadjwý ne me ar amã Metĩndjwýnh kabẽn jarẽ, Metĩndjwýnh kabẽn kute mýjja 'y pyræk ne me ar amã arẽ. Nhym me kute ar amã arẽnhja ne kute me àkre pyræk. Djãm Metĩndjwýnh kabẽn punu prãm? Kati. Mex rã'ã: rã'ã. Tãm ne me ar amã arẽ gar aman arým tu amim Metĩndjwýnh markumrêx. Nã gãm ar mýjja nhingrõt mãn prabê tu amim markumrêx. Nhym kam arým ar amã ajamak bô gar arým adjumar djã ny kute mrãmri ne me prĩre bixadjwýr nykam umar djã ny pyræk. Ne kam arým amã Metĩndjwýnh kĩ:nh ne aje mar prãm: ne aje katàt amijo aba prãm: ne. Metĩndjwýnh ne amikabẽn pýnh ne arẽ. Djãm kute atemã kabẽn 'õ jarẽnhmã ne kute o kabẽn tũm japanh ne o biknormã? Arkati. Kute amikabẽno biknor kêtikumrêx. ²⁴Ikabẽnja kôt ne me amrêbê: me bakukãmãremã kabẽn jarẽn memã kum,

“Ga, bôja pumũ. Bõ tĩn 'ikrãne ne arým mjõ. Me badjwý ne gu me bakunĩ batĩn ne ar baba 'ikrãne.

Ga, pidjõrã mexkumrêxja pumũ. Pidjõrã mex 'ikrãne ne arým rôrõk ne. Me badjwý ne gu me bamex 'ikrãne.

²⁵Nhym be, Metĩndjwýnh ne amikabẽn pýnh ne arẽ. Djãm kute iby atemã kabẽn 'õ jarẽn ne kute o kabẽn tũm japanh ne o biknormã? Arkati. Kute mar tỳx rã'ã: rã'ã ne.”^b

Nãm me ã me bakukãmãremã ane. Kam ne gwaj kabẽn mar pýnh. Amrêbê ne me kàj bê ar amã Kritu'ã ujarẽnh ny jarẽ. Kabẽn pydjĩn arẽ gar mar pydji.

2 ¹Me kute ar amã Kritu'ã ujarẽnh ny jarẽn ar aje mar pydjikam on wãnh me kàxã akabẽn punu kanga.

Aje memã ajêxkôt me noo abiknor on wãnh kanga.

On wãnh ajêx ne aje amijo Jeju mar mexja kanga.

Me'õ nhõ mýjja'ã angryk on wãnh kanga.

Akabẽn punu kunĩ on wãnh kanga.

²Metĩndjwýnh kabẽn kute me kà kangô pyræk dja ga amã kĩnh. Aje me prĩre rwýk ny pyræk kute kum kà djành pyræk ã amã kabẽn kĩho ane. Ne kabẽn maro tẽ:n maro amũ amikamẽn mar ra:x ne. ³Aje arým amim Bẽnjadjwýr djwýnh mex kakinhkam dja ga ã amã kabẽn kĩho ane.

^b 1.25 Kute amikabẽn jarẽn ne o biknor kêtikumrêx. Kute apýnh mýjja jarẽn kôt dja mýjja kunĩ apõx mexkumrêx.

Kute Kritu'ã kên jakre.

⁴Kritu ne kute kên pyrâk. Nhym be, kên ne tîn ne ar ba kêt. Nhym be, Kritubit ne tîn ne ar ba. Kute kên pyrâk gar arÿm 'ÿr bôx. Nhym me kwÿ arÿm kanga. Nhym be, Metîndjwÿnh ta arÿm amijo utà. Kute o me utàr kadjy arÿm amijo utà. Kum kî:nhkumrêx kute mrâmri ne me kum kên pân̄h rax kînh pyrâk.

⁵Ar gadjwÿ ne gar aje apÿnh kên pyrâk. Nhym be, kên ne tîn ne ar ba kêt. Ar gajbit ne gar atîn ne ar aba. Aje apÿnh kên pyrâk. Ga, me bakukâmâre kute kên Metîndjwÿnh nhô kikreti nhipêxja pumû. Ar gadjwÿ ne Metîndjwÿnh arÿm ar ajo kran ar amâ Karô jano nhym kam arÿm ar akam nhÿn ar ajo ba. Gar kam arÿm abeno anhôbikwa mexo mô. Nâm ar ajo kute mrâmri ne kên kikreti nhipêxo môr pyrâk. Ne kam ajte amim ar apumjuw, kute ar ajo me kadjy Metîndjwÿnh mar djwÿnhmâ ne ar apumjuw. Ga, me kadjy Metîndjwÿnh mar djwÿnh kute Metîndjwÿnh nhô kikretikam kum mry bôr nhym kum kînhja pumû.

Ar gadjwÿ Karô kute ar ajo bakam ne gar kum apÿnh kînh djâ nhôro aba nhym kum kînh. Ar aje tu amim Jeju Kritu markam ne kum kînh. ⁶Be, nhym kam Metîndjwÿnh kên'ã Kritu jakre. Kên pân̄h raxja, me kum kînhja'ã ne akren me bakukâmâremâ kum,

“Ota ba krîraxbê Xijâokam kên kikremo kajpa nhym dja. Kên mexkumrêx, kên pân̄h rax ne ba amijo utàn kudja.

Me kute tu amim kênja markumrêx dja me pijâm kadjy kêtumrêx.” Nâm Metîndjwÿnh ã Kritu'ã me bakukâmâremâ ane nhym me arÿm 'ã pi'ôk no'ôk ne. ⁷Ar ga ne gar arÿm tu amim Kritu markumrêx ne arÿm amâ kî:nh. Amâ kînh kute mrâmri ne me kum kên pân̄h rax kî:nh pyrâk.

Nhym be, me amakkre kêtja ne me kute amim Kritu mar kêt ne kanga. Nhym be, Metîndjwÿnh ta arÿm kâjmâ kum rax kamê nhym arÿm ra:x. Kritu'ã ne amrêbê me bakukâmâre memâ ajarê. Nâm me memâ kum,

“E kum kên ja ne me kute kikreo âm djwÿnhja kute kikremâ armâ te omün kam bôm kumê.

Kên ja ne arÿm kute kikremo kajpar, kum kajpar tÿxi”, ane. Be ga, me bakukâmâre kute amrêbê: memâ anhÿr kôt me arÿm kute Kritu kangaja pumû. Nhym kam Metîndjwÿnh arÿm kâjmâ kum rax kamê nhym arÿm ra:x ne. ⁸Nâm me memâ kum,

“Kên ne kute me par tok nhym kam me rôrôk prâmkumrêx”, ane. Me amakkre kêt ne me kute me rôrôkja pyrâk. Nâm me kute amim Kritu mar kêt ne kam arÿm me biknor tokry djâkam akuno. Metîndjwÿnh kute amrêbê: me'ã amim karô kôt dja me arÿm akuno.

⁹Nhym be, ar ga ne Metîndjwÿnh arÿm amijo ar apytà. Ar ga ne gar aje mrâmri ne me kadjy Metîndjwÿnh mar djwÿnh rûnh pyrâk. Nhym Bênjadjwÿr djwÿnh ne ar ajo ba. Ar abê Metîndjwÿnh nhô me wÿnhkumrêx nhym arÿm amim ar ajo ba. Ar gajbit ne amim ar ajo ba. Amrêbê ne gar ajaxwe: ne aje mrâmri ne me akamât kô tykkam rôrôk baja pyrâk. Gar ari ajaxweo aba nhym

Metîndjwýnh arým amiwýr ar ajuw ne ar ajo ba. Jakam ar aje mrãmri ne me irākam katāt ba pyrāk ne katāt Metîndjwýnh kôt ar amijo aba. Ne kam arým memā ra:xmẽ mextire 'ã adjujarênh ar aba. ¹⁰Amrêbê ne gar ate me kajgo kôt ar aba. Nhym Metîndjwýnh arým jakam ar ajo kran amikôt ar ajo ba. Amrêbê ne kum ar akaprî kêt. Ne kam arým jakam kum ar akaprî.

¹¹Ga, me me bajtem nhô pykakam ar baja pumũ. Djãm me kute amikukràdjà kangan me bajtem kukràdjà marn kôt amijo ba prãm? Kati. Ar gadjwý ne gar me kum Metîndjwýnh kính kêtja mẽ ro'ã ar aba. Me kum amidjwýnhbito kính prãmkam axwe:. Me axwe kôt ar ajaxwe pyma:. Djãm ar aje Metîndjwýnh kukràdjà kangan me axwe kukràdjà 'amýnh ne kôt ajaxwemã? Kati. Kwārîk wānh. Dja gar Metîndjwýnhmã amijangri tỳx.

¹²Me kute Metîndjwýnh mar kêtjamẽ ro'ã ar abakam dja gar katāt ar amijo aba. Nhym kam me ar apumũn arým ar ajã 'êx jabej ne arîk ar ajã kute,

—Ga, me axweja pumũ, anhýr jabej. Kwārîk wānh rã'ã. Ar ga dja gar memã katāt ar amijo aban adjukaprî. Katāt ar amijo aba: nhym kam Kritu arým bôx. Bôx nhym me arým amiman Metîndjwýnhmã kum,

—Mrãmri amexkumrêx. Me kute amim amarja katāt ar amijo ban ukaprî. Ba kam gadjwý amex ma. Mrãmri amexkumrêx, ane. Dja me ar akatāt pumũn arým ã Metîndjwýnhmã ane.

Me kute me bēnjadjwýr kabēn marmã.

Rô 13.1; Xit 3.1

¹³Ba ar amã arê gar ama. Dja gar pykakam me bēnjadjwýr kabēn kunî ma. Mýkam? Bir, gar arým kâjkwakam anhô Bēnjadjwýr djwýnh kabēn maro aba. Ta ne arým ar amã me'ã karôn ar amã,

—Pykakam ar anhô bēnjadjwýr kabēn ma, ane. Kute ar amã anhýrkam ar aje pykakam anhô bēnjadjwýrdjwý kabēn marmã. Bēnjadjwýr raxo kute me bēnjadjwýr kunî jakrenhja dja gar kabēn ma. ¹⁴Nâr me bēnjadjwýr kute atãri ar amã ýr ja dja gar kabēn ma.

Metîndjwýnh ta ne ar amã me bēnjadjwýr jano. Ta ne ar amã aje me kabēn marmã arê. Mýj kadjy ne ar amã me arê? Bir, dja me bēnjadjwýr me axweo bikêho ba. Nâr, dja me katāt kute amijo bajamã mex jarêho ba. Me kute ã meo anhýr kadjy ne ar amã me bēnjadjwýr jarê. Kam, dja gar me bēnjadjwýr kabēn man katāt ar amijo aba. ¹⁵Katāt ar amijo aba nhym kam me kwý ar ajã kabēn kajgo kumex jarê. Me bēn kati dja me ã ar ajã ane. Kwārîk wānh rã'ã. Ar ga dja gar arek katāt ar amijo aban 'ã adjukanga kêt. Nhym kam amũ me krãptî arým ar amexkôt ar apumũn arým me kabēn kajgoja mar kêt. Nhym kam me arým anhikrên arek dja. Dja gar aje katāt amijo abao ã me kabēn kajgoja nhityo ane. Metîndjwýnh kute ar amã 'ã karô kôt dja gar ã ane.

¹⁶Amrêbê ne gar te ajaxwe kêtma ne ajaxwe rã'ã. Jakam ne Kritu arým ar ajaxwebê ar apytàn arým ar amã tỳx jangij. Ar ajaxwebê ar atỳxkam

ar ga ne gar arek mekôt ar aban adjumar mex. Arek mekôt ar abakam kwârîk wānh arîk ar aba kêt. Ga, me kwỳ kute,

—Ba ne ba arek mekôt ar iban idjumar mex, anhÿrja pumũ. Nām me anen kam arîk ar ban axwe:. Ne kam me kute mrāmri ne me kute kubêkà mex jangjênh ne kadjwÿnhbê punu rā'ā pyrāk. Kwârîk wānh ā amijo anhÿr kêt. Ar ga dja gar abê Metîndjwÿnh nhô âpênhkumrêx ne kum adjâpênh tÿx ne katât kabên man kôt ar amijo aba.

¹⁷Me kunî ar aje kâjmā memā rax kamênh kadjy dja gar amima. Jeju kukwakam ar aje meo akamyja ar amā me abê. Amā Metîndjwÿnh rax pyman bēnjadjwÿr raxja kâjmā kum rax kamê.

¹⁸Me kute ar ajô ar apa 'amÿnh gar memā adjâpênh kajgo ar aba ar, ar amā ne ba ikabên jarê. Dja gar akrānmā pykakam ar ajo ba djwÿnhmā adjâpênh katât ne rax ma. Djām ar ajo ba djwÿnh mex ne kabôt katikambit dja gar kabên kôt kum adjâpênh katât? Kati. Àkrê prām kamdjwÿ kum adjâpênh katât.

¹⁹Mÿj dja gar nēn kam arÿm Metîndjwÿnh kînh nhym ar amā mex jarê? Bir, dja gar katât Metîndjwÿnh kabên man kôt ar amijo aba. Nhym kôt me arÿm ar ajo ajkê gar kôt arÿm atokry ne akaprî ma. Kam dja gar Metîndjwÿnh kînh nhym arÿm ar amā mex jarê.

²⁰Godja gar ajaxwe nhym me pānh ar ajo bikênh jabej gar kam akrānmā amitokry mar jabej. Djām kam gar arÿm Metîndjwÿnh kînh nhym kute ar amā mex jarênhmā? Kati. Nhym be, godja gar katât ar amijo aba nhym me arÿm kôt ar ajo bikênh jabej gar kam akrānmā atokry mar jabej. Katât ar aje amijo abakambit dja gar arÿm Metîndjwÿnh kînh nhym ar amā amex jarê. ²¹Katât ar aje amijo abakôt me kute ar ajo bikênh gar kôt atokry. Ja kadjy ne Metîndjwÿnh amiwÿr ar ajuw ne ar ajo ba. Ga, Kritudjwÿ gwaj bakadjy tokryja pumũ. Gwaj baje kudjwa katât amijo baban kôt batokry kadjy ne gwaj bakadjy tokry.

²²“Djā nām Kritu axwe? Kati. Djā nām memā 'êx ne me noo akno? Kati.”^c

²³Me kum àkjêrkam djā nām amipānh memā akij? Kati. Tokrykam djā nām me kangrô? Kati. Nām Metîndjwÿnhmā amijarê. Kute katât memā axwe pānh jarênh djwÿnhkumrêx jamā ne amijarê. ²⁴Kritu ta ne pîte'ykam gwaj bajaxweo pānh. Mÿj kadjy ne gwaj bajaxweo pānh? Bir, gwaj bamā bajaxweo prām kêt kadjy.

Ga, me tyk kum axwe prām kêtja pumũ. Gwaj badjwÿ arÿm batykmān prabê bamā bajaxweo prām kêt ne ar baban baje kabên marn kôt baje amijo baba prām. Ja kadjy ne arÿm gwaj bajaxweo pānh. Mry kà punuo ne me prîne ôm nhym kam Metîndjwÿnh arÿm kôt gwaj bajo mex gwaj kam ā bamā bajaxweo prām kêt ane. ²⁵Ga, mryo ba djwÿnh kêt kam mryki'atomti arÿm no biknor ne ate ar baja pumũ. Ar gadjwÿ ne gar ate ar aba. Nhym be, jakam gar arÿm ajo ba djwÿnh Jeju'ÿr amijo akêx ne kôt ar amijo aba nhym arÿm ar apytâro ba.

^c 2.22 Amrêbê ne Metîndjwÿnh kukwakam kabên jarênh djwÿnhbê Idjaij ja jarê nhym kam Pedru kôt arê.

Kute prômê mjênma abenâ karô.

Xit 2.2; Xim k 2.9, 3.11

3 ¹Ê, ar apa, arým ar amjênwã, ar amã ne ba ikabên ne. Dja gar akrânma amjên kabên maro aba. Ar ajô amjên kute amim Metîndjwýnh kabên mar prãm kêt jabej ga dja ga katât kabên kôt ar amijo aban í arým 'l'yr o akêx ne. ²Godja te amim Metîndjwýnh kabên mar kêt ne arým apumû. Katât aje amijo aban amã Metîndjwýnh rax pymakôt arým apumû. Ne kam amex kôt arým Metîndjwýnh'ýr amijo akêx ne tu amim markumrêx.

³Be, mýj dja ga amexkam akute nhym me kum akînh ne? Djãm akunhêrkam nâr djãm akî prîne mex nâr djãm apýnh anhô kên karýrkam nâr djãm aje akà mex jangjênkhkam? Djãm akunhêr jabit ne arým kôt amex? Kati.

⁴Bir, mýj dja ga ga amexkam akute nhym me kum akînh ne? Bir, dja ga anhökre kadjwýnhbê akabên mexbit man memã aprîren akrânma memã abên rereko aba nhym me arým kum akînhkumrêx. Nhym kam Metîndjwýnhdjwý kum akî:nhkumrêx kute mrâmri ne me kum ô mýjja pân'h rax kînh pyrâk.

⁵Amrêbê ne me bakukâmäre nîre kwý mextiren axwe kêt ne ar ba. Ne Metîndjwýnh kanârrâm ar ban arým kabên mexbit jarên akrânma mjên kabên maro ba. ⁶Ga, Xara kute Abraão kabên marja pumû. Nãm katât kôt ar amijo ban kum rax jarên'h ar o ba. Ar aje Xara tãmdjwý pyrâk dja gar kudjwa amjên kabên man arým atîn prãm kêt.

⁷Ê, ar apa, arým ar aprôwã, ar amãdjwý ne ba ikabên ne. Kwãrîk wãnh amidjwýnhbît maro aba kêt ne prîne amim aprô maro aba. Ajitýxo aje aprô jakrenkhkam kum aprî:ren amã abê. Djãm amã aprô jabê kêt nhym Metîndjwýnh kute amarmã? Aje kum amijo adjã'wýr nhym kute amarmã? Kati. Dja ga amã abê kêt nhym Metîndjwýnh arým amar kêt. Nhym be dja ga amã aprô jabê nhym arým akabên ma. Djãm apydji ne Metîndjwýnhkôt atîn ne ar abamã? Kati. Metîndjwýnh djukaprîkôt ne ga aprômê kôt ar atîn ne ar abamã.

Me kute katât amijo bamã.

Ep 4.1; Kor 1.10; Tex k 4.1; Ped k 2.12

⁸Jakam ne ba ar akunîmã ikabên. Gora ar akunî axikôt abenma akabên jarê. Kwãrîk wãnh amidjwýnhbît maro aba kêt. Dja gar aben maro aba. Kute me kamy kum kamy jabê pyrâk dja gar ã amã aben jabêo ane. Ar amã aben kaprîn amijo angrin akâtãm ne ar abeno aba.

⁹Kwãrîk wãnh me'ô ar ajo ajkê gar amipân'h o abikên'h kêt. Nâr, kwãrîk wãnh me'ô ar amã akij gar amipân'h kum adjãkjêr kêt. Ate dja gar kum akabên mex jarên o djuw mex. Ar aje ã abenma anhýr kadjy ne Metîndjwýnh amiwýr ar ajuw ne ar ajo ba. Ja dja gar aman ikabên kôt amijo ane nhym Metîndjwýnh í arým ar amã akînh djã ngân ar ajo djuw mex. ¹⁰Amrêbê: ne me bakukâmäre memã kum, "Ar adjumar mex ne atîn 'l'ryn ar abamã djãm ar amã ja kînh? Mýj dja gar kadjy amijon?

Bir, kwārîk wānh akabên punu'ô jarênh kêt. Aje me noo abiknor kadjy, kwārîk wānh memã ajêx kêt.

¹¹ Godja me arîk ar ban axwe on memã akâx. Ar ga dja gar ajaxwe kêt ne amã me kaprî.

Ar akunî abenkam adjumar mex kadjy dja gar aben nêje aben jakren akabôt katin ar aba ne 'ã adjukanga kêt.

¹² Mÿkam dja gar abenkam adjumar mex? Bir, Bênjadjwÿr djwÿnh kute katât me kute amijo baja pumûnh.

Ne kam me kute kum amijo à'wÿrkam arÿm kute me kabên marn kam kute me kabên kôt memã ipêx.

Nhym be, me axweja ne Metîndjwÿnh arÿm mekam no kà nhàn ngryk ne arÿm mebê aptà”, ane.

Me kute amrêbê: me bakukâmâremã anhÿrkam dja gar ã amexo ane.

¹³Ar amex prâmkam djâm me kute ar ajo bikênh prâm? Kati. ¹⁴Nâr gar katât ar amijo aba nhym me kôt ar ajo bikênh jabej gar arÿm atokry. Atokry japôkmã akînh. Akînh ja dja gar ama. Kwārîk wānh kam ar amã me uma kêt ne atîn prâm kêt.

¹⁵Ne ate Bênjadjwÿr djwÿnh, Metîndjwÿnh ma. Ne mexo umatija ma. Ne ano tÿx. Amikôt aje memã amijarênh kadjy ano tÿx. Dja me abej akukij ne amã,

—Mÿj ne ga aman arÿm, “Dja ba Metîndjwÿnh kôt itîn ne ar iba rã'ã: rã'ã ne”, anhÿro aba? Mÿj ne ga ama? ane. Dja me ã abej akukjêro ane ga kam amikôt memã amijarên memã kum,

—Kritu ikadjy ty. Ba arÿm tu amim markumrêx. Kam dja ba Metîndjwÿnh kôt itîn ne ar iba rã'ã: rã'ã ne, ane. Kwārîk wānh memã bêx kêt. Metîndjwÿnh mexo uma dja gar aman memã aprîren memã amijarê.

¹⁶Dja gar katât ar amijo aban amikam ajaxwe'ô mar kêt nhym me arÿm ar ajã 'êx ne memã kum,

—Djâm tâmwã katât kute amijo ba got? Kati, axwe, anhÿro ba. Kwārîk wānh rã'ã. Dja te me ar ajã anhÿro ba, ar ga dja gar katât amijo aba rã'ã. Ne katât amijo aba tâmtã: nhym kam me arÿm ar akatâtkumrêx kôt ar apumûn arÿm amikam pijâm ne. Me amikam pijâmmã dja gar katât amijo ar aba rã'ã.

¹⁷Mÿkam ne me ar ajã kabên punu? Bir, godja Metîndjwÿnh ar atokry'ã amim karô jabej. Kute ar ajã amim karô kôt ne me ar ajã kabên punu gar arÿm atokry. Ajaxwe kêt ne atokry. Ne te atokry ne Metîndjwÿnhmâbit amexkumrêx. Nhym be, me kwÿ axwekumrêx nhym Metîndjwÿnh arÿm memã axwe jarê nhym me arÿm tokry:. Nhym be, ga te ajaxwe kêt ne atokry, ja ne mex.

¹⁸Be ga, Kritudjwÿ tokryja pumû. Gwaj bajaxwekôt tokry. Gwaj bajaxwekumrêx nhym ta axwe kêtumrêx ne arÿm gwaj bajaxwe pānh tokry. Kute Metîndjwÿnh'ÿr gwaj bajo akêx kadjy tokry. Nām me kubî. Kritu nhikumrêx nhym me kubî. Nhym kam Metîndjwÿnh Karô akubyn o tîn ne.

¹⁹Amrêbê: Nôwe me bakukâmâremê ro'ã ar bakam ne ngô me imex nhym me arÿm ty. Nhym kam Metîndjwÿnh arÿm me karôbê ijê. Me tîn

ne ar bari ne Metĩndjwỳnh arỳm Nôwemã Karõ jano nhym arỳm kum arẽ. Kum arẽ nhym kuman arỳm kàj bê me akren memã kum,

—Ar ajaxwe:. On wãnh ajaxwemã anhire. Nãm ã memã anhỹro ba. Kute kà raxo ãmri ne ã memã anhỹro ba.

²⁰Nôwe te memã ane nhym me axwe rã'ã ne. Nhym kam Metĩndjwỳnh ngryk tô:n te me kute amijaxwe krã'yrmã kam ama:. Nhym kam ngô arỳm me imex nhym me arỳm ty. Nhym kam Metĩndjwỳnh arỳm me karôbê ijê. Nhym be, me ngrêrebit arỳm amim kabên ma. Ar kubê 8bit arỳm amim kabên man arỳm wãnh axwemã ire. Ne kam arỳm kãmã wadjàn kam tyk kêt. Ga, ar kute amim Metĩndjwỳnh mar ne arỳm kàkam ýrja pumũ. Kam Metĩndjwỳnh arỳm ngôkam ar utàn ar aro ba.

²¹Gwaj badjwỳ ne gwaj tu amim Kritu markumrêx nhym me arỳm ngômã gwaj bajangij. Mỳj'ã ne ngô kurũm bajapôxja amijakre? Bir, Jejumẽ ro'ã akubyn batĩn'ã ne amijakre. Gwaj Jejumẽ ro'ã akubyn batĩnkam ne gwaj arỳm Jejukôt katàt ar amijo baba. Djãm mỳjja punu'ô gwaj banhĩ'ã atom nhym me gwaj bajã ku'ô? Kati Gwaj katàt ar amijo baban arỳm amim,

—Metĩndjwỳnh ne katàt ije amijo ibakôt kute imar, anen arỳm bakĩnhkumrêx ne. Ja'ã ne ngô kurũm bajapôxja amijakre.

²²Mrãmri ne Jeju akubyn tĩn kàjkwamã wabin arỳm Metĩndjwỳnh djubôk'anh nhỹ. Bẽnjadjwỳr rax ne memã nhỹ ne kute raxo, umao mỳjja kunĩ, me kunĩ jakrenh. Kute kadjy mrãnh djwỳnhmẽ me bẽnjadjwỳrmẽ me 'itỳx kunĩ jakrenh mex ne kabêno me anoro nhỹ.



(1 Ped k 3.20)

Me kute katàt Metîndjwýnh kabên kôt amijo ba'ã kute memã karô.

Ep 4.17; Kor 3.5

4 ¹Kritu nhĩkumrêx ne arým gwaj bapãnh tokry. Ar aje ja markam dja gar amikukãm mã amim,

—Badjwý dja ba kudjwa itokry, ane. Dja gar ã amim ane. Mýkam? Bir, dja gwaj kudjwa batokryn arým amim Metîndjwýnh mar týt ne kam arým bajaxwe prãm kêtumrêx ²ne bamã mýjja punu kĩnh kêt. Djãm me axwe kôt dja gwaj amidjwýnhbito kĩnh kadjy amima, bamã mýjja punu kĩnh kadjy amima? Kati:. Arým Kritu kudjwa batokrykam dja gwaj Metîndjwýnh kabên man kôt amijo baba kadjy amima.

³Amrêbê me kute Metîndjwýnh mar kêtja kôt gar amijo aban aprô djwýnh kupa'ã nâr amjên djwýnh kupa'ã akurê aba. Ne amã mýjja punu kĩnh. Ne kadjwati kangôkam^d ajajbã. Ne me torkam abixaêr punu. Ne kadjwati kangôkam aben týt jabej. Ne mýjjao metîndjwýnh karô nhípêxmã amijarêho aba. Ja ne punu:re. NhyM Metîndjwýnh ar akam ngryk. Gar kam arým Metîndjwýnh'ýr amijo akêx ne tu amim markumrêx.

⁴NhyM kam me amakkre kêt arým ar ajã kabê:n. Me kute axweo ba týt rã'akam ar ajã kabên ne. Me abenmã kum,

—Je tô, mýkam ne me arým gwaj bakôt bixaêr kêt? anen kam arĩk abenmã kum,

—Nãm gwaj ba kôt ar ba kêt. Axwe. Nãm me ã abenmã ar ajã ane.

⁵Me wã dja me ĩ prĩne amijaxwe kôt Metîndjwýnhmã amijarê nhyM arým memã axwe pãnh jarê. Kute memã axwe pãnh jarênh kadjy arým memã dja. Me tĩnmê me tykmê arým memã dja. ⁶Ê, me arým tykja me tĩnri ne me memã Kritu'ã ajarê. Mýj kadjy? Bir, me tĩnri, pykakam ar bari kute amijaxwe mar ne kam arým tykkam Metîndjwýnhkôt tĩn ne ar ba kadjy ne me memã arê.

⁷Me kunĩ kute aminhinomã amimênh djã nhô akati bôx 'ýr. Kam dja gar akrã mex kadjy amiman ajaxwe kêt kadjy amijãno djan kum akabêno aba.

⁸Ar aje Metîndjwýnhmã akabênkam amex. NhyM be, ar amã aben jabêkam gar arým ar amexo amũ amikamên arým ar amexti:re. Kam ar amã aben jabê:. Dja gar amã aben jabên arým aben jaxwe krãptio aknon mar kêt ne.

⁹Dja gar abenmã anhũrkwã jarên abenkam aku. Kwãrik wãnh aben kãxã ar anhô mýjja'ã maje amim,

—Mýj kadjy dja ba kum inhô mýjja jarê? anhýr kêt. ¹⁰⁻¹¹Metîndjwýnh Karô ne ar amã adjãpênh djã'ã karô. Apýnh ar anhĩ djãri ar amã 'ã karô gar apýnh adjãpênh djã maro aba.

Ar ajô aje memã kabên jarênh'ã kute ar amã karôja, Metîndjwýnh kabênkumrêx dja gar memã arê. Kwãrik wãnh memã kabên kajgo'ô jarênh kêt.

^d4:3 Mýjja me kute o kôm ne kôt bibãnh kunija, kadjwati kangômê uba kangômê, mýjja kangô kunĩ ne me kum kadjwati kangô jarê.

Ne ajte kute ar ajômã aje meo djuw mex'ã karôja dja gar memã mỳjja nhôro aba ne me kadjy adjâpênhkumrêx. Aje meo djuw mex kadjy Metîndjwỳnh arỳm ar amã tỳx jadjà. Dja gar arerek kêt ne meo djuw mexo aba. Metîndjwỳnh ne ukapri:kumrêx. Ar gadjwỳ dja gar adjukaprikumrêx ne ar adjâpênh djã'ã adjukanga kêt ne memã adjâpênh ar aba. Memã adjâpênh kunikôt dja me arỳm Metîndjwỳnhmã mextire jarê. Ne kum,
 —Ga ne ga adjukapri:kumrêx. Akabênkôt ne Jeju Kritu bôx. Ba arỳm tu amim markumrêx, ane. Metîndjwỳnh ne ra:x ne kute me kunio ba djwỳnh. Rax rã'ã: rã'ã ne. Ne ren me kunĩ kum rax jarê. Mrãmri. Tãm ne ja.

Me kum me kute amim Kritu marja kurê.

Mat 10.16; Dju r 16.1; Pir 1.29; Idja 12.3

¹²Akmere, àpnhĩre ar, ba ar amã arê gar ama. Ga, me kute kuwykam kên karỳr jadjwỳrja pumũ. Me adjuw nhym ôr ne xêr nhym mỳjja punu kunĩ apôx. Ar gadjwỳ dja ar akapri djã ar ajo ba gar atokry: ne. Birãm ar amãbit ne kute me kute amim Jeju marja tokry prãm kêt pyræk. Gar kam amim,
 —Je tô ba ne ba ije amim Jeju maro iba nhym itokry ja ijo ba. Mỳkam? ane. Kwãrik wãnh amim ja jarênh kêt. ¹³Be ga, Kritu tokryja pumũ. Me kute amim Kritu mar krãptîdjwỳ kôt tokry. Ar gadjwỳ dja gar kôt atokry. Kwãrik wãnh kam akapri kêt. Dja Kritu me:xkumrêx ne uma:n arỳm bôx. Godja jakam kôt atokry jabej dja gar bôxkam akĩnhti:rekumrêx.

¹⁴Ar aje amim Kritu mar nhym me arỳm kam kum ar akurê. Djãm kam ar akapri got? Ga, Metîndjwỳnh Karô ar amê amijo kajkepja pumũ. Karô ra:xkumrêx ar amê amijo kajkep. Kam te me kum ar akurê gar akĩnhkumrêx. Me ta ne me Kritu'ã kabên punu. Nhym be, ar ga ne gar kum mextire jarê.

¹⁵Nhym be, dja ar ajô aje me par nhym me kôt ajo ajkê ga atokry. Nâr, adjãkĩnhĩ nhym me kôt ajo ajkê ga atokry. Nâr aje amim me kukjêr prãm nhym me kute amã amijarênh ga aje amũ memã me arênh prãm. Nhym me arỳm kôt ajo ajkê ga atokry. Nâr ajaxwe 'ô nhym me kôt ajo ajkê ga atokry. Djãm kam akĩnh? Kati. Ajaxwekam akaprikumrêx. Kwãrik wãnh ã amijo anhỳr kêt.

¹⁶Nhym be, aje mrãmri amim Kritu markumrêx nhym me arỳm kôt ajo ajkê ga atokry. Kwãrik wãnh kam apijãm kêt. Dja ga kam Metîndjwỳnhmã rax jarên kum,

—Djünwã, ije amim Kritu markam ne me ijo ajkê ba itokry. Ba kam ikĩnhkumrêx, ane.

¹⁷Apỳnh gwaj baje marja Metîndjwỳnh kute gwaj bajaxwe jabej amim gwaj bakukjêrmã. Ô akati gwaj bawỳr bôx 'ỳr. Gwaj bajo dja amim me kukjêrmo krax. Gwaj bajo kute memo kraxkam mỳj dja ĩ arỳm me amakkre kêtka nê? Bir, dja me axwe jabej amim me kukij nhym me arỳm amijaxwe kôt kum amijarê. Nhym kam arỳm memã pãnh rax jarê. Me kute Kritu'ã ujarênh ny mar kêt pãnh tokry rax jarê. ¹⁸Amrêbê: ne me bakukãmãre ije ar amã arênhja kôt memã kum,

“Metîndjwỳnh kute me katât kute amijo baja pytâr ne tô, kam àpênh rax.

Nhym kam mã dja me axwemê me kute Metĩndjwýnhbê amijo akẽxja mekam nê?

Bir, mrãmri dja memã pãnh jarê nhym me axwe pãnh tokrykumrêx.” Nãm me bakukãmãre ã memã ane.

¹⁹Tãm ne ja. Metĩndjwýnh kute ar ajã amim karõ kôt dja gar katàt ar amijo aban ajmã akute kêt ne ar aba. Ne te katàt amijo aban arým atokry jabej. Kum amijarê gê ta ar atokrykam ar apytã. Metĩndjwýnh kute ar anhipêx djwýnh kute ar amarkumrêx ne ar ajã ukanga kêtumrêx. Kum amijarê gê ta ar ajo ba.

Kute meo ba djwýnhmã àpênh'ã karõ.

5 ¹Ar akam ar abê Jeju nhõ me jao aba djwýnhwã ba ar amã ikabên jarên ar adjàpênh djã'ã ar amã karõ. Dja gar ikabên ma. Ota, badjwý ibê Jeju nhõ me jao iba djwýnh. Ba ne ba Kritu tokrykôt omũ. Dja ba ajte omũ. Djãm rerekren kajgo ba omũ? Kati. Dja ra:x ne uma: ba arým omũn kôt ar iba.

²Ga, me kute me õ krito djuw mex nhym memã abatànha pumũ. Ar gadjwý dja gar wãkam me kute amim Jeju marmã arênho aba. Memã Metĩndjwýnh kabên jarênho aba gê me mar mexo amũ amikamên mar rax ne. Djãm me'õ ne kute ar amã ar aje meo aba'ã àpnênh tỳx gar amã uman kabên kôt ar aje me omũnho abamã? Kati. Ar ga dja gar amã me omũnh kĩnh ne meo aba. Djãm ar aje pi'ók kaprĩbit mar ne aje amim o adjãptàr kadjy meo abamã? Kati. Ar amã me kĩnhkam dja gar me o aba. ³Djãm ar aje amiraxo adjãmran Metĩndjwýnh nhõ me ja janoro abamã? Kati.

Ga, mrykĩ'átomtio ba djwýnh õ krit kukãm katàt baja pumũ. Katàt ba nhym õ krit arým kôt katàt amijo ba. Ar gadjwý dja gar Metĩndjwýnh nhõ me ja kukãm katàt ar amijo aba gê me ajã amim, “Ba gêt kudjwa”, anen arým ar akudjwa katàt ar amijo ba.

⁴Ga, me kute aben rer djãja pumũ. Kam me'õ kute me kunĩ rerja dja kĩnh djã'ã arým amim krãdjê byn kutu. Pi'õo krãdjê tu. Nhym kam pi'õo krãdjê tẽmbê punu. Ar gadjwý dja gar katàt õ me ja kukãm amijo aba mex ne arým amim akĩnh djã by. Õ me jao ba djwýnh djwýnh dja bõx. Jeju dja bõx ne arým ar amã ar akĩnh djã mexti:re ngã gar arým amim aby. Djãm ar akĩnh djã rerek mã? Djãm punumã? Arkati. Kute ar amã ar akĩnh djã nhõr ja dja mex rã'ã: rã'ã ne.

⁵Ar ajabatàn nyredjwý, ba ar amã ikabên jarê. Dja gar mebêngêt kabên ma. Arým me abatànham dja gar me kabên man kôt ar amijo aban amim, —Djãm ije iraxo me akrenh? Kati. Ikajgo, anen abenmã amijo angrin akajgo. Mỳkam? Bir, amrêbê: me bakukãmãre memã kum,

“Me amijo àmra prãmja Metĩndjwýnh arým mebê aptã.

Nhym be, me kute amijo kajgo dja Metĩndjwýnh tu mekam ukaprikumrêx”, ane.

⁶Metĩndjwýnh 'itỳxo kubê kumkati dja gar rax man kam arým amijo akajgo. Amijo akajgo: nhym ã akati 'õkam arým kàjmã ar akamên ar ajo

rax ne. ⁷Dja gar rax ma:n kum ar adjumar punu djà kunĩ jarênho aba. Kute ar amar ne ar ajo djuw mexo ỹrkam ã kum anhỹro abao ane.

⁸Ar ano mex ne amijã ano tỳx ne aminêje rīt. Ga, rop jamrexe kār ar baja pumũ. Nãm kute mry'õ krēnmã abej ar ba. Akurê djwýnhbê Xatanajdjwý ne 'itỳ:x ne àkrê: ne kabēn 'itỳ:x ne me abej ar ba. Kute me'õbê Jeju kurēmã nhym 'ã ukangamã ne abej ar ba. ⁹Dja gar tu amim Metĩndjwýnh mar tỳxkumrêx ne 'ã adjukanga kêt ne o arỳm Xatanajbê aptàn arek kubê dja. Xatanaj ar abê Jeju kurê prām ne ajte pyka kunĩkôt me bakamydjwýbê kurê prām. Jeju kukwakam ar aje meo akamyjabê kurê prām nhym me ar akudjwa arỳm tokry. Ja dja gar aman kubê aptà.

¹⁰Metĩndjwýnh ta ne tu kum me kaprĩ:kumrêx^e ne prĩne kute me kunĩo djuw me:xkumrêx. Ta ne Kritu djàpēnhkôt amiwýr ar ajuw ne ar ajo ba. Dja gar õ kàjkwakam kôt atĩn ne ar aba rã'ã: rã'ã ne. Ja kadjy ne amiwýr ar ajuw. Be, ar atokry kàjbê 'irykam dja prĩne ar ajo mex. Ta dja akubyn ar amã tỳx jadjà gar kôt adjām tỳx ne 'ã ar adjukanga kêtumrêx. ¹¹Gê me kunĩ kum mex jarēnh rã'ã: rã'ã ne. Gê me kunĩmã rax rã'ã: rã'ã ne. Tãm ne ja.

¹²Ije ar amã ikabēn jarēnh ja ne ba Xibanumã arē nhym arỳm 'ã pi'õk no'õk gar arỳm amim arē. Me bakamybê Xibanu ne tu amim Jeju markumrêx ne 'ã ukanga kêtumrêx. Ba ar amã ikabēn jarēnh 'ikrān nhym 'ã pi'õk no'õk ne. Ar akĩnhmã ne ba ar amã arē. Ba ar amã mrāmri Metĩndjwýnh ta tu kum ar akaprĩkumrêx jarē. Kam dja gar tu amim markumrêx ne 'ã adjukanga kêtumrêx.

¹³Krĩraxbê Babirōnijkam me kute amim Jeju mar ne ar aben pydjio baja ne me ar amã kabēn mex jarē. Metĩndjwýnh kute meo ba kadjy arỳm amijo me utà. Ar gadjwý arỳm amijo ar apytà. Makōdjwý ar amã kabēn mex jarē. Tãm ne mã ikôt ajkamēn arỳm kute ikra pyrāk.

¹⁴Dja gar abenwýr bōx ne abenmã akabēn mex jarēn aben pa krij. Ar amã aben jabêkam aben pa krijn aben tatak ne.

Gê ar aje amim Kritu Jeju mar kunĩwã umar mex. Tãm ne ja.

^e 5:10 Djām me ba ne gu me badjukaprĩ nhym pānh kum me bakaprĩ Kati. Me ba ne gu me badjukaprĩ kêt. Ta ne kum me bakaprĩkumrêx.